

Si₂ carta a₂ca₂jmo₃ San Pablo ne₄ dsa₂

GÁLATAS

*Jmo*₅ Pa₄ si₂ a₂chein₃ ne₄ Guá'₅ i₂chan₂ 'uë₃ Galacia

¹ Jniá₂ Pa₄, líng₅ i₂chen₄ quián₅ Te₁gui'₅₄ la₁ tsá₃ líng₅ i₂'ín₁ quián₅ dsa₂ mi₂güüg₃, on₃ guë'₂ i₂chen₄ quián₅ dsa₂ mi₂güüg₃ né₃. Líng₅ jan₂ i₂'ín₁ quián₅ Jesucristo, quian'₅₄ Diú₄ Jmei₂ i₂ca₂jme₃jein'₅₄ ja₁jme₁rë₂'liin₅₄. ² Jniá₂, quian'₅₄ ca₂le₃jín₃ rin'₅₄ jniog₄ i₂quiang'₅₄, jmo₂ jnia'₅₄ si₂ carta la₂ a₂dsian'₅₄ jnia'₅₄ ja₁con₂ ca₂le₃jín₃ guá'₅ i₂chan₂ 'uë₃ Galacia. ³ Jui₁jme₂gu'₅₄ bá₄ Diú₄ 'nia'₂, jui₁jmo₅₄ bá₄ Diú₄ Jmei₂ quian'₅₄ Te₁gui'₅₄ Jesucristo né₃, jui₁'ei₅ bá₄ tei₄tion'₅₄ 'nia'₂. ⁴ Jesús 'éi₂ bá₄ ca₂gue₃ 'mú₃ 'uig₅₄ dsáu₁ jniog₄, a₂lió₂ jë₄ mi₂güüg₃ 'lig'₅₄ la₂, co₂jaun₂ ca₂rë₃'ñi₃ó₃ dsí₅ Diú₄ quián₂ i₂lín₅ jmei₂ jniog₄. ⁵ 'Éi₂ bá₄ jui₁le₂juin'₂ co₂tan₅₄! A₂méi₃.

*Tsá*₃ ma₃jág₁ siá'₂ cha₂ jua'₅₄ a₂lión₂ dsa₂

⁶ Dsi₂gó'₃ dsi₃ ia₁ ma₂'niog'₂ 'nia'₂ téng'₄ cón'₂ Diú₄ i₂ca₂të₃ 'nia'₂ të₂le₃ ia₁ a₂'ua₁ dsí₅ Cristo. Ia₁ a₂ma₂nag'₂ táng₃ 'nia'₂ jág₁ siá'₂. ⁷ On₃jua'₅₄ a₂dsi₂jó'₃ a₂cha₂ guë'₄ jág₁ dse₃ siá'₂ a₂lió₂. La₁ia₁ juá'₅ jniá₂, chan₂ i₂lín₅₄ i₂i₂nio₄ jmo₅ a₂dsi₂cón'₅ 'au'₂ 'nia'₂. A₂'nio₃ jme₃tsiin₃ jág₁ dse₃ la₂ quió'₅ Cristo a₂tín'₄ dsa₂. ⁸ La₁ në₁jua'₂ chan₂ i₂jme₂tin₅ 'nia'₂ caun₂ jág₁ a₂juá'₂ a₂tín'₄ dsa₂, la₁ në₁jua'₂ tsá₃ lé₅ con'₂ lé₅ jág₁ a₂ma₂'é₄ jnia'₅₄, dsa₂ 'éi₂ jui₁të₂tsin'₅₄ náu₃ a₂dsi₃'éin₂. Tsá₃ a₂nag₅₄ o₁jñia'₅₄ guio₅₄ jnia'₅₄, o₃ o₁jñia'₅₄ jan₂ ángel i₂jás guei'₅₄ i₂juíg₃. ⁹ Jui₁lia'₂ ma₂jua'₅₄ jnia'₅₄ në₅, juá'₄ táng₃ siá'₂: në₁jua'₂ chan₂ i₂'é₂ jág₁ a₂ma₂rë₂tsín₄,

a₂tsá₃ lé₅ con' ₂ lé₅ a₂ma₂gue' ₅₄ 'nia' ₂, dsa₂ 'éi₂ jui₁tē₂tsiin' ₅₄
 náu₃ a₂dsi₃'éin₂. ¹⁰ ¿'E₂ lín' ₂ 'nia' ₂? ¿O₃ bá₄ a₂jme₂'uá₁ jniá₂
 dsí₅ dsa₂ mi₂güüg₃ con' ₂ dsi₂ten₅₄? ¿O₃ bá₄ a₂jme₂'uá₁ jniá₂
 dsí₅ Diú₄ 'e₂? ¿O₃ bá₄ jmo₅ jniá₂ a₂'ñio₂ dsí₅ dsa₂ mi₂güüg₃
 'e₂? Tsá₃ ma₃le₃jua' ₅₄ a₂líng₅ gué₄ dsa₂ i₂jme₂ti₃ ja₁con₂
 Cristo, jua' ₅₄ mei' ₂ gué₃ le₂jaun₂.

'A₂ lia' ₂ ca₂lín₃ Pa₄ jan₂ i₂chen₄ quián₅ Jesús

¹¹ Jui₁le₂ñi' ₅₄ 'nia' ₂ rin' ₅₄ jniog₄, jág₁ dse₃ a₂tín' ₄
 dsa₂ a₂qui₂'é₅ jniá₂, on₃jua' ₅₄ jág₁ a₂le₃jua' ₅₄ a₂lë₁'no' ₂
 dsa₂ mi₂güüg₃ dsí₅. ¹² On₃ guë' ₂ jua' ₅₄ a₂ca₂gue₃ jniá₂
 quió' ₅ 'i₁jan₂ dsa₂ mi₂güüg₃, on₃ guë' ₂ jua' ₅₄ chan₂
 dsa₂ i₂ca₂jme₃tag₅ jniá₂. 'ñiog₅ bá₄ Te₁gui' ₅₄ Jesucristo
 ca₂jme₃jniai₂₃ jág₁ në₅ ja₁cong₂. ¹³ Ia₁ ma₂ca₂rë₃ñi' ₅₄ bá₄
 'nia' ₂ 'a₂ lia' ₂ jme₁líng₄ le₂jñiá₅, lia' ₂ con' ₂ jme₁'eng₅₄ gué₄
 juá' ₅ quió' ₅ dsa₂ judíos. Ma₂ñi' ₅₄ bá₄ 'nia' ₂ né₃ a₂dséi₂ dsi₃
 gué₄ lín₃ ca₂'éng₃ dsa₂ quián₅ Diú₄, 'ñio₅ lín₃ jme₁quíñ' ₅
 jniá₂ bí₂ a₂co₂dsia₅ jme₁'éng₄ dsa₂ 'éi₂. ¹⁴ Ia₁ jniá₂ bá₄
 i₂jme₁dsi₂jñiág₄ 'ñio₅ lín₃ gué₄ con' ₂ gué₄ ca₂le₃jín₃ dsa₂ go₃
 i₂co₂ríng₂ quiang' ₅₄. Ia₁ jniá₂ 'ñio₅ lín₃ gué₄ jme₁jme₂gó₁
 jmo₂₃ 'í₁ tag₄ quió' ₅ dsa₂ can' ₅₄ quián₂ jnia' ₅₄ ma₂líg' ₂. ¹⁵ La₁
 lia' ₂ con' ₂ né' ₃ a₂le₃chang₂, ca₂quió' ₂ Diú₄. A₂'ua₁ dsí₅ gué₄
 lín₃ ca₂të₃ jniá₂. Ca₂rë₃'ñió₃ dsí₅, ¹⁶ ca₂jmo₃ ca₂rë₃cuíng₅
 ca₂'iin₃ Ja₁ñi' ₅₄, ia₁jaun₂ qui' _{é₄} jniá₂ jág₁ dse₃ quió' ₅,
 jin₄ dsi₂nau₂. Jaun₂ tsá₃ jua' ₅₄ ca₂ñeg₅₄ ca₂i₁'niag' ₂ dsa₂
 mi₂güüg₃ i₂to' ₂ jág₁, ¹⁷ on₃ guë' ₂ ca₂ñeg₅₄ juig₂ Jerusalén
 jua' ₅₄ ca₂i₁jíng₁₂ i₂ma₂lín₅ dsa₂ i₂chen₄ quián₅ Te₁gui' ₅₄,
 i₂ma₂ja₂lén₂ jñiá₅ gué₄ lia' ₂ con' ₂ gué₄ jniá₂. Dsi₂jui₅
 bá₄ ca₂ñeg₅₄ le₂'uig₅₄ jui₅ 'uë₃ Arabia. Cang₂ gué₄ jaun₂
 ca₂ñág' ₃ jui₅ Damasco. ¹⁸ Jme₁ca₂dsin₃ 'ni₅ ñi₂ cang₂ jaun₂,

jaun₂ gué₄ ca₂neg₅₄ Jerusalén ca₂i₁dsia₂ jág₁ quian'₅₄ Pe₄.^{*}
 Ja₁jaun₂ ca₂jan₅₄ guia₃-'ñiá₂ jmi_g₄. ¹⁹ La₁ 'i₁jan₂ i₂sián'₂
 i₂lín₅ i₂chen₄ quián₅ Jesús tsá₃ ca₂jing₅₄, jñia'₅₄ lia'₂ jan₂
 Jacobo dsó₂ rin'₅₄ Te₁gui'₅₄ bá₄. ²⁰ Jág₅ bá₄ Diú₄, jág₁ dsau₅
 bá₄ tó'₅ ne₄ si₂ la₂, tsá₃ tē₂jing₁. ²¹ Cang₂ jaun₂ gué₄ né₃,
 ca₂ñó₃ le₂tan₅₄ juig₂ ja₁tén₄ 'uē₃ Siria quian'₅₄ Cilicia.
²² Rin'₅₄ jniog₄ quián₅ guá'₅ chan₂ 'uē₃ Judea né₃ i₂tión₂
 le₃quió'₅ Cristo, tsá₃ jme₁ma₂cui_g₂₃ dsi₁ne₁. ²³ Jñia'₅₄
 lia'₂ jme₁ma₂nág₂ bá₄ dsia₅ rin'₅₄ jniog₄ 'ag₂₃ juá'₂: “Dsa₂
 i₂jme₁co₂'ein₅ jniog₄ le₂jñiá₅, la₁ rē₂né₃ né₃ ma₂ñi₂₃ ján₃ 'é₂
 jág₁ a₂jme₁'nio₃ jme₁'éin₂ le₂jñiá₅.” ²⁴ Jaun₂ ca₂jme₃juin'₂
 Diú₄ bá₄ o₄quió₃.

2

Dsa₂ i₂chen₄ sián'₂ guein₂₃ Pa₄

¹ Jme₁ca₂ñi₂ guia₃-quén₂ ñi₂ cang₂, jaun₂ gué₄ ca₂neg₅₄
 táng₃ Jerusalén quiang'₅₄ Bernabé. Tito né₃, ca₂jáng₂.
² Ca₂neg₅₄ ja₁jaun₂ ia₁ ca₂jme₃jñia₅ Diú₄ ne₃ a₂ca₂tíng₂
 nei₅₄. Jaun₂ ca₂dsia₃ bá₄ jniá₂ ne₄ dsa₂ i₂tián'₅ Jerusalén 'éi₂
 jág₁ dse₃ nē₅ a₂'é₅ jniá₂ jin₄ dsi₂nau₂, la₁ jmá'₃ lia'₂ quian'₅₄
 dsa₂ i₂lia'₂ lé₅ i₂quian₅ ne₄ jui₅ bá₄, jē₄ con'₂ jmá'₃ guio₅₄
 bá₄ jñia'₅₄, ca₂dsiá₁ jág₁ ia₁jaun₂ tsá₃ lé₅ jua'₅₄ a₂lē₁ñi₅ jniá₂
 jmo₂₃ ta₁ a₂tsá₃ ta₁ tí₄. ³ Ca₂lia'₂ jñia'₅₄ Tito, i₂jme₁quian'₅₄
 jniá₂, tsá₃ ca₂chi₃quióng₂ dsa₂ jmi_g₄ jua'₅₄ a₂tion₅₄ jme₃ti₃
 'éi'₃ a₂jme₁ti₃ ni₁lo₁₂, o₁jñia'₅₄ jme₁lín₄ 'éi₂ griego. ⁴ Jág₁
 nē₅ ca₂ñó₃ ia₁ i₂lín₅₄ dsa₂ i₂ju₁gan₂ i₂juá'₂ lín₅ rin'₅₄ jniog₄,
 ca₂i₃toin'₅₄ con'₂ tē₃co'₅₄ jē₄ quián₂ jñia'₅₄, a₂jme₁'nio₃
 tiog₃ con₂ 'í₁ 'a₂ lia'₂ lé₅ chong₂ jñia'₅₄ con'₂ dsa₂ ma₂lón₂
 le₃quió'₅ Cristo Jesús, ia₁ tsá₃ ma₃tio'₅₄ jniog₄ 'éi'₃; la₁
 'éi₂ né₃ jme₁'nio₃ jme₁to'₂ táng₃ 'éi'₃ guei₂ jaun₂. ⁵ La₁

* 1:18 griego: Cefas.

tsá₃ 'ein₂ ca₂cuë₃ jnia'₅₄ jmig₄ jnia'₅₄ 'i₁ca₂tiá₂ tei₄ jua'₅₄
jme₃gau₅ 'éi₂, ia₁ 'niog₂ jnia'₅₄ a₂caun₂ o₁nóg'₅ cha₂ jág₁
dsau₅ ja₁con'₂ 'nia'₂ jág₁ dse₃ a₂lión₂ dsa₂.

⁶ Jui₁lia'₂ dsa₂ i₂lia'₂ lé₅ lín₅ dsa₂ dsen₅₄ i₂juá'₅ jniá₂,
(ton'₂ ján₃ bá₄ tsá₃ a₂jaun₂ tion₅₄ 'ín₅ dsi₃ le₃guion₅₄ 'a₂
lia'₂ ma₂a₂lén₂ 'éi₂ jmo₂₃ guioin₅₄. Ia₁ tsá₃ 'í₁ jaun₂ con₂
Diú₄ jua'₅₄ 'a₂ lia'₂ jniá₂ dsa₂), jui₁lia'₂ dsa₂ 'éi₂ né₃, tsá₃ 'e₂
ngag₅₄ jua'₅₄ a₂ca₂jme₃tag₂₃ gué₄ con'₂ lé₅ jág₁ a₂'és jniá₂.

⁷ Ia₁ të₂le₃ ca₂rë₃lí'₄ bá₄ guioin₅₄, co₂jaun₂ bá₄ ta₁ a₂ma₂cuë₃
Diú₄ a₂'é₄ jniá₂ jág₁ dse₃ jin₄ dsi₂nau₂, * jui₁lia'₂ lé₅ ta₁
ma₂dsia₃ gu₂ Pe₄ a₂'é₂ jág₁ dse₃ jin₄ dsa₂ judíos.† ⁸ Jaun₂
Diú₄ i₂jan₂ tan₅₄ 'éi₂ bá₄ ca₂chein₃ gué'₂ Pe₄ a₂lín₅ 'éi₂ dsa₂
i₂chen₄ quiáin₅ të₂le₃ jin₄ dsa₂ judíos, le₂jaun₂ bá₄ ca₂chei₃
gué'₂ jniá₂ ján₃ a₂lín₅ i₂chen₄ quiáin₅ të₂le₃ jin₄ dsi₂nau₂.

⁹ Jaun₂ lë₃, Jacobo, Pe₄, ‡ quian'₅₄ Juan₅₄ né₃, co₂'nió'₄ i₂lín₅
dsa₂ dsen₅₄ quián₅ guá'₅, ca₂rë₃lí'₄ bá₄ guioin₅₄, 'niog₅ bá₄
Diú₄ ma₂cuë₃ ta₁ në₅, jaun₂ ca₂cuë₃ gu₂ a₂ca₂jmo₃ léi₄,
jniá₂ quian'₅₄ Bernabé co₂'nió'₄ a₂'ei₅ caun₂ jág₁ quiaín₅₄
a₂dsau₅₄ jnia'₅₄ dsi₁jmó₁ ta₁ ja₁con₂ dsi₂nau₂. Guioin₅₄
gué'₂ táng₃ dsi₂jmó₂ ta₁ jin₄ dsa₂ judíos. ¹⁰ Jnia'₅₄ lia'₂
a₂jaun₂ bá₄ jág₁ a₂ca₂cuë₃ a₂jmó₁ jnia'₅₄ dsiog'₂ dsi₅ dsa₂
te₂ñé₂, a₂në₅ bá₄ gué'₂ a₂'ín₅ dsi₃ jniá₂ quín'₅ jniá₂ bí₂jmo₂₃.

Ca₂jí₂ Pa₄ ca₂jéin₂ Pe₄ juig₂ Antioquía

¹¹ La₁ lia'₂ con'₂ ñe₄ Pe₄ juig₂ Antioquía, ca₂jéin₂
jniá₂ dsi₁ne₁, 'uig₅₄ ia₁ a₂jmo₂₃ a₂tsá₃ dsi₂ten₅₄ jmo₃.

¹² Ia₁ le₂jñiá₅ jme₁gué'₅ co₂dsia₅ quiaín₅₄ dsi₂nau₂;
la₁ jme₁ca₂dsi₃lén₂ i₂chen₄ quián₅ Jacobo, jaun₂ gué'₄
ca₂jme₃lióg₃ ca₂ñó₃ cau₅, tsá₃ ma₃ca₂gué'₃ quiaín₅₄ dsa₂

* 2:7 lit. “jin₄ dsa₂ i₂tsá₃ lo₄ rë₂uing₄.” † 2:7 lit. “jin₄ dsa₂
i₂rë₂uing₄ lo₄”; ján₃ bá ‡ 2:9 griego: Cefas; ján₃ bá

'éi₂, 'uig₅₄ ia₁ a₂gain₃ dsa₂ i₂ti₅ lo₄. ¹³ Jaun₂ dsa₂ judíos i₂'én₂ sián'₂ ca₂jme₃quiain'₅₄ bá₄ Pe₄ a₂lë₁co₂jmo₂₃ o₁ne₁ quiong'₅₄; ca₂lia'₂ le₂jio₅ Bernabé ca₂ñó₃ quiong'₅₄ ján₃. ¹⁴ La₁ jme₁ca₂jág₃ jniá₂ tsá₃ jmo₂₃ lia'₂ con'₂ lé₅ tí₅ dsón'₂ juá'₂ jág₁ dse₃, jaun₂ ca₂juíg₂ jniá₂ Pe₄ tē₃nag₅ le₃jín₃ dsa₂:

—'Ne₂ guë'₂ líng'₅ jan₂ dsa₂ judío, le₂jaun₂ bá₄ guë'₂ chang'₂ jmo'₂ lia'₂ lé₅ chan₂ dsi₂nau₂, on₃jua'₅₄ rē'₂ con'₂ lé₅ jme₁jmo'₂ ia₁ a₂líng'₅ dsa₂ judío, ¿'a₂ bá₄ lia'₂ jaun₂ chi₁quiang'₅₄ jmig₄ dsi₂nau₂ a₂le₃chain₂ con'₂ lé₅ chan₂ dsa₂ judíos?

¹⁵ 'Lág₅ jniog₄ judíos con'₂ lé₅ chong₂, —ca₂juíg₂ jniá₂ Pe₄—, on₃jua'₅₄ rē'₂ jui₁lia'₂ dsi₂nau₂ i₂qui₂rē₂cán'₄ dso₄.

¹⁶ Jaun₂, a₂ne₄ bá₄ jniog₄, 'i₁jan₂ tsá₃ 'ein₂ guén'₂ Diú₄ nē₂jag₄ i₂tsá₃ 'e₂ dso₄ rin₂, jua'₅₄ a₂jme₃ti₃ 'Éi'₃, jnia'₅₄ lia'₂ a₂le₃'én₂ bá₄ dsa₂ tē₂le₃ quió'₅ Jesucristo. 'Uig₅₄ jaun₂ ca₂tē₂ jniog₄ ján₃ ma₂ca₂rē₃'éin₂ tē₂le₃ quió'₅ Jesucristo ia₁jaun₂ bá₄ guéi'₂ Diú₄ jniog₄ nē₂jag₄ a₂tsá₃ ma₃'e₂ dso₄ rē₂cáu'₄, tē₂le₃ a₂jnia'₅₄ con'₂ 'éin₂ bá₄, on₃jua'₅₄ rē'₂ a₂'nió'₅ jme₁ti₁ ta₁ qui'₅ 'Éi'₃. Ia₁ 'i₁jan₂ tsá₃ 'ein₂ chén'₅ rē₂ ne₄ Diú₄ tē₂le₃ quian'₅₄ a₂jme₂ti₃ 'Éi'₃. ¹⁷ Nē₃ né₃, chi₂jua'₂ 'niog₂ jniog₄ tē₃tsag'₅₄ dse₃ tē₂le₃ ne₄ Diú₄, 'uig₅₄ ia₁ a₂ma₂tióng₂ le₃quió'₅ Cristo, jaun₂ gué₄ ca₂dsióg₃ rē₂jniá₂ a₂lág₅ jniog₄ dsa₂ i₂qui₂rē₂cán'₄ dso₄ bá₄ ján₃, ¿on₁ bá₄ 'nió'₄ le₃jua'₅₄ Cristo tē₂le₃ cuē₅ bí₂ bá₄ jniog₄ a₂caun₂ 'nióg₁ dso₄? ¿Dsón'₂ bá₄ on₃jua'₅₄ le₂jaun₂!

¹⁸ Ia₁ chi₂jua'₂ co₂dsia₅ ma₂ca₂'éng₃ caun₂ cosa, con'₂ siá'₂ guë'₂ 'nio₃ chog'₅₄ táng₃, jaun₂ gué₄ dsón'₂ a₂jme₂jniág₁ 'ñiós, a₂ma₂ca₂i₁juing₅₄ 'éi'₃. ¹⁹ Tsá₃ 'io₅ bí₂ 'Éi'₃ jua'₅₄ a₂chei'₃ rē₂ ne₄ Diú₄. Jaun₂ nē₂jag₄ bá₄ i₂co₂dsia₅ ma₂jon₅ bá₄ jniá₂ tē₂le₃ ne₄ 'Éi'₃ ia₁jaun₂ le₃chang₂ táng₃ tē₂le₃ ne₄ Diú₄. ²⁰ Jaun₂ co₂'nió'₄ ca₂tē₁ton₅₄ bá₄ jniá₂

co₂lë₅ quian'⁵⁴ Cristo ne₄ cróg₄; jaun₂ on₃jua'⁵⁴ 'ñió₃ jniá₂ chang₂; 'ñiog₅ bá₄ Cristo i₂chan₂ jui₅ jme₂dsí₂ quió₃. Lia'₂ con'₂ lé₅ chang₂ ni₁ñí₅ la₂, chang₂ të₂le₃ a₂jñia'⁵⁴ con'₂ 'éng₂ të₂le₃ quió'⁵ Ja₁ñi'⁵⁴ Diú₄, i₂ca₂rë₃'nio₃ jniá₂, ca₂jñin'₂ 'ñiog₅ o₄quió₃ jniá₂. ²¹ Jaun₂ tsá₃ 'nio₃ jniá₂ jua'⁵⁴ a₂jmo₅₄ cau₅ a₂'ua₁ dsí₅ Diú₄; ia₁ jua'⁵⁴ mei'₂ gué₃ guion₅₄ dsa₂ lé₂ le₃jmo₃ a₂chein'₃ rë₂ ne₄ Diú₄ të₂le₃ quian'⁵⁴ a₂jme₃ti₃ 'Éi'₃, tsá₃ 'e₂ ta₁ tí₄ a₂ca₂jon₃ Cristo jua'⁵⁴ mei'₂ gué₃ le₂jaun₂.

3

'A₂ lia'₂ guén'₂ Diú₄ dsa₂
¹ | 'En₁ jmá'₃ tsá₃ rë₂'en₅₄ 'au'₂ 'nia'₂ dsa₂ gálatas! ¿ 'Ein₂ bá₄ je₂na'⁵⁴ i₂ca₂jme₃gau₅ 'nia'₂? Jua'₂ ma₂ca₂té₂ bá₄ ne'⁵⁴ 'nia'₂ guiong'⁵⁴ a₂ma₂ca₂jme₁jnia₅ jnia'⁵⁴ të₃dsón'₂ 'ñiog₅ Jesucristo i₂të₁ton₅₄ cróg₄. ² ñag₄ caun₂ 'nia'₂ a₂juá'₄ la₂; ¿ 'A₂ lia'₂ ca₂guen'⁵⁴ 'nia'₂ Jme₂dsí₂ quián₅ Diú₄? ¿ Ca₁guein'⁵⁴ 'nia'₂ ia₁ a₂ca₂jme₁ti'₄ ta₁ qui'₅ 'Éi'₃ quió'₅ Moisés? ¿ O₃ bá₄ ca₂guein'⁵⁴ 'nia'₂ jme₁ca₂rë₃'éng'₂ jág₁ a₂ma₂nei'₂ 'e₂ 'nia'₂? ³ ¿ 'A₂ bá₄ lia'₂ ñí₄ tsá₃ rë₂'en₅₄ 'au'₂ 'nia'₂? ¿ O₃ bá₄ 'nú'₂ 'nia'₂ 'au'₂ a₂jme₁'ñiag'₂ quian'⁵⁴ jui₅bí₂ quiáng'₂ guiong'⁵⁴ a₂ma₂ca₂jme₁líóg'₄ quian'⁵⁴ Jme₂dsí₂? ⁴ ¿ O₃ bá₄ tsá₃ 'e₂ ta₁ tí₄ ca₂le₃jé₃ a₂ma₂ca₂i₃ñí₂ 'nia'₂? Jui₁le₅₄ bá₄ a₂cha₂ ta₁ jmo₃ bá₄ ca₂la₂ a₂jaun₂. ⁵ Jë₁ma₂ca₂cuin₃ Diú₄ Jme₂dsí₂ quián₅ jmo₂₃ léi₄ juë'₂ jin'₄ 'nia'₂, ¿ 'e₂ lë₃ jmo₂₃? On₃jua'⁵⁴ a₂jaun₂ guë'₂ jmo₂₃ ia₁ a₂jme₂ti'⁵⁴ 'nia'₂ 'Éi'₃. A₂jaun₂ bá₄ jmo₂₃ léi₄ juë'₂ të₂le₃ ia₁ a₂ca₂rë₃'én'₂ 'nia'₂ jág₁ a₂ma₂nei'₂ bá₄. ⁶ Ia₁ Abraham né₃, ca₂rë₃'éin₂ të₂le₃ quió'⁵ Diú₄. A₂ca₂rë₃'éin₂ jaun₂, ca₂guéi'₂ Diú₄ në₂jag₄ bá₄ i₂ca₂rë₃ti'⁵⁴ 'éi'₃.* ⁷ 'Uig₅₄ jaun₂ né₃, ca₂tín'₂ 'nia'₂ le₃ñi'⁵⁴: jui₁lia'₂ dsa₂ i₂'én₂, i₂'éi₂ bá₄ i₂lín₅

* 3:6 Génesis 15:6.

të₃dsón'₂ co₂'nió'₄ tsi₁jon₂ Abraham. ⁸ Ne₄ Si₂ gui'₅₄ jaun₂ ca₂juá'₂ Diú₄ të₃jñiá'₅ ca₂tsí'₃ Abraham a₂guein₃ le₂jio₅ dsi₂nau₂ të₂le₃ jñia'₅₄ con'₂ le₃'éin₂ bá₄, co₂'nió'₄ në₂jag₄ bá₄ i₂le₃ti'₅₄ 'éi'₃, jme₁ca₂juá'₂ le₂la₂: “Ca₂le₃jé₃ juig₂ te₁'i₁ gua'₅₄ 'uë₃ jme₁gon'₅₄ jniá'₂ të₂le₃ quian'₅₄ 'ne₂.”† ⁹ Jaun₂ le₂në₅ bá₄ né₃, ju₁lia'₂ dsa₂ i₂'én₂ né₃, i₂'éi₂ bá₄ i₂lín₅ dsa₂ i₂rë₂gon'₅₄ quián₅ Diú₄ co₂dsia₅ quian'₅₄ Abraham i₂ca₂rë₃'én₂ 'éi₂.

¹⁰ Dsa₂ i₂jmo₅ dsí₅ a₂tioin'₅₄ 'Éi'₃ tióin₂ juí₅ 'éi'₃ a₂dsi₃'éin₂. Ia₁ juá'₂ ne₄ Si₂: “Ca₂le₃jín₃ i₂tsá₃ jme₂ti₃ ca₂le₃jé₃ 'éi'₃ a₂tio'₅₄ ne₄ Si₂ tioin'₅₄ 'éi'₃ a₂dsi₃'éin₂.”‡ ¹¹ Rë₂ bá₄ léi₄ jaun₂ né₃, 'i₁jan₂ tsá₃ 'ein₂ lé₂ le₃náu₃ rë₂ ne₄ Diú₄ të₂le₃ ia₁ a₂jme₃ti₃ 'Éi'₃. Ia₁ ne₄ Si₂ juá'₂: “Dsa₂ i₂guén'₂ Diú₄ co₂'nió'₄ i₂lín₅ i₂dsen₃, të₂le₃ a₂jñia'₅₄ con'₂ a₂'éin₂ bá₄ le₃chain₂.”§ ¹² La₁ 'Éi'₃ Juá'₅ quió'₅ Moisés né₃, on₃juá'₅₄ a₂cha₂ ja₁já₄ 'uig₅₄ a₂'én₂ dsa₂ jaun₂. Ia₁ të₂le₃ le₂la₂ bá₄ juá'₂: “Dsa₂ i₂jmo₅ lia'₂ con'₂ lé₅ juá'₂ 'Éi'₃, quian'₅₄ 'Éi'₃ jaun₂ le₃chain₂.”* ¹³ Cristo ca₂quí₃ ca₂lió₂ jniog₄ uig₅ a₂jme₁ca₂tág₂ guéi₁ con'₂ lé₅ 'Éi'₃. Ia₁ ne₄ Si₂ juá'₂: “Ma₂rë₂'é₂ uig₅ ja₁con₂ chi₂juá'₂ 'ein₂ i₂të₂ton₅₄ guei'₅₄ 'ma₂.”† ¹⁴ Le₂në₅ ca₂quí₃ ia₁jaun₂ a₂dse₃ jaun₂ a₂ca₂jme₃gon'₅₄ Diú₄ Abraham, ηag₅ le₃ja₁con₂ dsi₂nau₂ të₂le₃ quian'₅₄ Cristo Jesús. Ca₂quí₃ ia₁jaun₂ guéi₁ jniog₄ ca₂le₃jág₃ të₂le₃ ia₁ a₂'éin₂, guén₄ Jme₂dsí₂ Jñiós a₂ma₂juá'₂ cuin₃.

Ju₁lia'₂ 'Éi'₃ Juá'₅, quian'₅₄ jág₁ a₂ma₂cuë₃ Diú₄

¹⁵ Rín'₅₄ jniog₄, la₂ cuë₅₄ jniá'₂ caun₂ jág₁ jáng'₅ léi₄ 'a₂ lia'₂ lé₅ jmo₅ dsa₂ mi₂güü₃: Ju₁lia'₂ jme₁quiog₂ dsa₂ caun₂

† 3:8 Génesis 12:3; 18:18; 22:18. ‡ 3:10 Deuteronomio 27:26. § 3:11

Habacuc 2:4. * 3:12 Levítico 18:5. † 3:13 Deuteronomio 21:23.

si₂ ja₁ tio'₅₄ jág₁ a₂ lí'₅₄ jaun₂ tio'₅₄ firma quió'₅, jaun₂ 'i₁ jan₂ tsá₃ 'ein₂ lé₂ le₃ jmo₃ tsá₃ quen₅ si₂ jaun₂, on₃ guè'₂ ma₃ lé₂ jua'₅₄ jmo₃ gué'₄ ñag₅₄ 'i₁ caun₂ con'₂ lé₅ jaun₂. ¹⁶ Jaun₂ le₂ nē₅ ca₂ cuē₃ Diú₄ jág₁ quió'₅ ca₂ cué'₃ Abraham quian'₅₄ chi'₂ dsio₄ 'éi₂. Ne₄ Si₂ quió'₅ tsá₃ juá'₂ jua'₅₄ a₂ 'iin₂₃ “juin₅ tsi₁ jon₂” 'éi₂. Ca₂ juá'₂ “tsi₁ jon₂ quiáng'₂”, † 'iin₂₃ jan₂ dsa₂ bá₄. I₂ jan₂ 'éi₂ lín₅ Cristo. ¹⁷ Le₂ la₂ bá₄ 'ë₅ jniá': Ca₂ jmo₃ Diú₄ caun₂ jág₁ quian'₅₄ Abraham. Jaun₂ jme₁ ca₂ gua₃ 'Éi'₃ Juá'₅ né₃, quen₂ 'ñiá₂-láu₂ rē₂ dsí₂ guióg₂-guiá₂ (430) ñi₂ cang₂ jaun₂, la₁ tsá₃ le₃ jua'₅₄ jua'₅₄ a₂ tsá₃ quen₅ jág₁ a₂ lí'₅₄ Diú₄ quian'₅₄ Abraham, on₃ guè'₂ le₃ jua'₅₄ a₂ tsá₃ jma₃ quen₅ jág₁ ron₅ a₂ rē₂ cué'₁ quió'₅ Diú₄. ¹⁸ Ia₁ jua'₅₄ mei'₂ gué₃ lé₂ gue₃ dsa₂ a₂ ca₂ tñin₂ a₂ cuē₃ Diú₄ tē₂ le₃ ia₁ a₂ jme₂ ti₃ 'Éi'₃, jaun₂ tsá₃ ma₃ le₃ jua'₅₄ jua'₅₄ a₂ gue₃ gué'₄ dsa₂ tē₂ le₃ ia₁ a₂ ma₂ cuē₃ Diú₄ jág₁ quió'₅. La₁ ca₂ cuē₃ Diú₄ jág₁ quió'₅ né₃ ca₂ cué'₃ Abraham a₂ ca₂ tñin₂ gue₃ a₂ lē₁ gue₃ co₂ ñi₂ bá₄. ¹⁹ ¿'E₂ ta₁ qui'₅ 'Éi'₃ Juá'₅ jaun₂ né₃? Cang₂ jaun₂ bá₄ ca₂ j_á, a₂ qui'₃ ta₁ a₂ 'ë₃ 'a₂ lia'₂ lé₅ qui₂ i₁ juin₅₄ dsa₂ 'no₂₃ dso₄. 'Éi'₃ jaun₂ ca₂ gua₃ ca₂ lia'₂ ca₂ guan₃ “tsi₁ jon₂ i₂ jan₂ i₂ 'iin₂₃ 'éi₂” con'₂ lé₅ jág₁ ma₂ cuē₃ Diú₄. 'Éi'₃ jaun₂ né₃, ca₂ tē₂ iron₅₄ tē₂ le₃ quian'₅₄ ángel i₂ ca₂ 'é₂ jág₁. Ca₂ tē₂ tsin'₅₄ jan₂ dsa₂ i₂ chén'₅ ne₄ jág₁. ²⁰ La₁ jme₁ ca₂ dsia₃ Diú₄ jág₁ quian'₅₄ Abraham le₂ 'uig₅₄, 'ñiog₅ bá₄ ca₂ dsia₃ jág₁. Tsá₃ 'ein₂ sián'₂ ca₂ nau₂ ne₄ jág₁. Ia₁ i₂ jan₂ tan₅₄ 'éi₂ bá₄ Diú₄ i₂ ca₂ juá'₂ jme₁ ca₂ juá'₂.

Ta₁ a₂ qui'₅ 'Éi'₃ Juá'₅

²¹ ¿O₃ bá₄ co₂ 'nió'₄ juá'₂ jaun₂ né₃, a₂ qui'₅ ta₁ 'Éi'₃ a₂ 'nio₃ 'ein₂ jág₁ a₂ ma₂ cuē₃ Diú₄? On₃ jua'₅₄ le₂ jaun₂. Jua'₅₄ mei'₂ gué₃ lé₂ le₃ cuē₃ 'Éi'₃ Juá'₅ caun₂ jui₅ ja₁ lé₂

† 3:16 Génesis 12:7; 13:15; 24:7.

le₃chan₂ jme₂dsí₂, jaun₂ bá₄ jme₁lé₂ le₃guen₃ Diú₄ dsa₂ të₂le₃ quian'₅₄ a₂jme₃ti₃ dsa₂ 'Éi'₃ jaun₂. ²² La₁ lia'₂ con'₂ lé₅ juá'₂ ne₄ Si₂, ca₂le₃jín₃ bá₄ dsa₂ tioin'₅₄ le₁'nei'₅₄ jui₅ ja₁'no₂₃ dso₄, ia₁jaun₂ të₂le₃ a₂jñia'₅₄ con'₂ 'éin₂ bá₄ të₂le₃ quió'₅ Jesucristo le₃gue₃ a₂ma₂juá'₂ Diú₄ cuë₃.

²³ Né'₃ a₂guá₂ jág₁ a₂le₃'én₂ dsa₂ né₃, jme₁tio'₅₄ jniog₄ le₁jnág₅ quian'₅₄ 'Éi'₃, co₂'nió'₄ a₂jme₁jmo₂₃ 'í₁ jniog₄, qui₂le₁jñia₁ a₂le₃jniá₂ a₂le₃'éin₂ jaun₂. ²⁴ 'Uig₅₄ jaun₂ bá₄ né₃, 'Éi'₃ ca₂jme₃góin₃ ne₄ quián₂ jniog₄, nē₂jag₄ bá₄ jan₂ të₅ i₂ca₂jio₃ ca₂tē₂ ja₁con₂ Cristo, ia₁jaun₂ jē₁ma₂ca₂rē₃'éin₂ të₂le₃ quió'₅ 'éi₂, lé₂ le₃tē₃tsag'₅₄ jniog₄ rē₂ ne₄ Diú₄. ²⁵ Jaun₂ rē₂né₃ né₃ ma₂gua₅ bá₄ a₂'éin₂ jniog₄, tsá₃ ma₃tio'₅₄ ne₄ 'Éi'₃ jua'₅₄ a₂jaun₂ a₂jio₅ gué₄ jniog₄, jmo₅ 'í₁. ²⁶ A₂lín'₅ 'nia'₂ ca₂le₃jíng'₃ chi'₂-guein₂ quián₅ Diú₄, të₂le₃ ia₁ a₂'én'₂ 'nia'₂ le₃quió'₅ Cristo Jesús. ²⁷ Jaun₂ ca₂le₃jín'₃ 'nia'₂ con'₂ i₂ma₂tion'₅₄ 'ei₅ caun₂ jág₁ quian'₅₄ Cristo lia'₂ con'₂ jme₁ca₂jñóg'₂ jmig₂, tión'₂ 'nia'₂ a₂rē₂jniág'₁ rē₂lín_g'₅₄ nē₂jag₄ bá₄ Cristo 'ñiog₅. ²⁸ Tsá₃ ma₃jma₃quén₅ tión₂ dsa₂, tsá₃ a₂nag₅₄ o₁jñia'₅₄ i₂lín₅ judíos, o₃ griegos, on₃ guē'₂ i₂lín₅ dsa₂ i₂jme₂ti₃ ta₁ ne₄ juig₅₄, on₃ guē'₂ dsa₂ i₂tsá₃ 'ein₂ ne₄ jme₂ti₃ né₃; dsa₂ ñe'₂, o₃ dsa₂ mí₂ 'e₂; ia₁ i₂co₂rín₂ bá₄ 'nia'₂ le₃quió'₅ Cristo Jesús. ²⁹ Chi₂jua'₂ tén'₅ 'nia'₂ le₃quió'₅ Cristo, jaun₂ gué₄ líng'₅ dsa₂ tsi₁jon₂ Abraham, jaun₂ ca₂tín'₂ 'nia'₂ guéi'₁ a₂lé₅ jág₁ a₂cuë₃ Diú₄.

4

¹ A₂la₂ bá₄ juá'₅ jniá₂: Tē₁lia'₂ bin'₅₄ guein₂, i₂ca₂tín₂ gue₃ a₂lé₅ jág₁ a₂cuë₃ jmei₂, tsá₃ jua'₅₄ jma₃quén₅ lín₅ quian'₅₄ dsa₂ i₂'lian'₅₄ quián₅ jmei₂, o₁jñia'₅₄ a₂dsau₅ jan₂ i₂'éi₂ bá₄ quió'₅ ca₂le₃jé₃. ² Chan₂ dsa₂ i₂jmo₅ 'í₁ nio₅

gu₂ ca₂le₃jé₃ a₂cha₂ quió'₅ 'éi₂, ca₂lia'₂ ca₂té₂ jmig₄ a₂'ë₅ jmei₂. ³ Jaun₂ le₂në₅ bá₄ lé₅ quian'₅₄ jniog₄. Të₁lia'₂ con'₂ big'₅₄, jme₁chong₂ jniog₄ le₁'ñei'₅₄ ne₄ 'éi'₃, tag₄ a₂jio₅ bí₂ ja₁con₂ dsa₂ mi₂güü₃. ⁴ La₁ jme₁ca₂dsin₃ jmig₄, ca₂chen₃ Diú₄ Ja₁ñi'₅₄, ca₂rë₃cháin₃ ca₂caun₃ jan₂ dsa₂ mí₂ dsa₂ mi₂güü₃, ca₂guain₃ lín₅ jan₂ dsa₂ i₂rë₂'en₅₄ ne₄ 'Éi'₃ Juá'₅. ⁵ Le₂në₅ bá₄ guain₃ a₂quí₃ a₂lió₂ ca₂le₃jág₃ jniog₄ con'₂ dsa₂ jme₁tio'₅₄ 'Éi'₃ jaun₂, ia₁jaun₂ guéi'₂ Diú₄ jniog₄ a₂ma₂lág₅ chi'₂-guein₂ quiáin₅. ⁶ Jaun₂, 'uig₅₄ ia₁ a₂lín'₅ 'nia'₂ chi'₂-guein₂ quiáin₅ né₃, jaun₂ ca₂chein₃ Jme₂dsí₂ quián₅ Ja₁ñi'₅₄ të₂dsi₅ jniog₄, jaun₂ Jme₂dsí₂ né₃ juá'₂: “¡Abba!* ¡Tia₅₄ quiáng₃!” ⁷ Le₂në₅ jaun₂, tsá₃ ma₂lín'₅ 'ne₂jan₂ i₂chi₁'ñe'₅₄ ne₄ 'éi'₃; ma₂lín₅ jan₂ ja₁ñi'₅₄ bá₄. Jaun₂ chi₂jua'₂ lín₅ jan₂ ja₁ñi'₅₄, ján₃ bá₄ ma₂lín₅ jan₂ i₂ca₂tín₂ gue₃ a₂lé₅ jág₁ cuë₃.

⁸ I₅ dsí₅ Pa₄ o₄quió'₄ dsa₂ 'én₂

⁸ Le₂ñiá₅, lia'₂ con'₂ tsá₃ Diú₄ jme₁ma₂cuin'₂ 'nia'₂, jme₁tiong'₅₄ le₁'ñeg'₅₄ ja₁con₂ diú₄ lag₄ i₂të₃dsón'₂ on₃jua'₅₄ i₂le₃jua'₅₄ diú₄ dsón'₂. ⁹ La₁ rë₂né₃ né₃ ma₂cuin'₂ 'nia'₂ Diú₄, co₂'nió'₄ juá'₅, ma₂cuin₅ Diú₄ 'nia'₂. Jaun₂ né₃, ç'₂ bá₄ lia'₂ lé₅ a₂o₂no'₅₄ táng₃ 'nia'₂ le₃ca'₃ tsá₃ caun₂ a₂qui₂'náu'₂ 'au'₂ a₂tóng'₂ táng₃ ne₄ 'éi'₃ tag₄ 'uan₅₄ a₂tsá₃ ta₁ tí₄? ¹⁰ Ia₁ jmo'₂ bá₄ gué₄ 'nia'₂ 'au'₂ a₂jme₂jué'₁ a₂lín₅₄ jmig₄, tsi'₂, ñi₂, jein₂ né₃. ¹¹ 'ñio₅ dsi₂gó'₃ dsi₃ ia₁ con'₂ tsá₃ ñó₅ në₁jua'₂ tsá₃ 'e₂ ta₁ tí₄ ta₁ a₂ma₂jmo₃ jniá₂ jín'₄ 'nia'₂.

¹² Rín'₅₄ jniog₄, chi₂len'₄ jniá₂ 'nia'₂ jui₁len'₅₄ bá₄ 'nia'₂ lia'₂ lín₅ jniá₂, ia₁ jniá₂ ma₂ca₂jmo₃ dsi₃ ján₃ a₂lín₅ lia'₂ lín'₅ 'nia'₂. Tsá₃ 'e₂ jua'₅₄ a₂tsá₃ dsi₂ten₅₄ a₂ma₂jmog'₅₄

* 4:6 Abba: co₂'nió'₄ le₃jua'₅₄: “Tia₅₄” quian'₅₄ jág₁ jmei₅ arameo.

'nia'₂. ¹³ Ia₁ ma₂ŋi'₅₄ bá₄ 'nia'₂, lia'₂ jme₁ca₂'é₃ jniá₂ jág₁ dse₃ a₂lión₂ dsa₂ jin'₄ 'nia'₂ le₂'uig₅₄, ca₂lë₃ le₂jaun₂ 'uig₅₄ caun₂ dso₄ a₂jme₁líng₄. ¹⁴ Dso₄ a₂ca₂jéin₃ jniá₂ jaun₂ nē₃ co₂'nió'₄ a₂ca₂caun₃ táu₂ Diú₄ 'nia'₂ bá₄ jaun₂. La₁ on₃jua'₅₄ a₂jaun₂ tsá₃ ca₂guei'₅₄ 'nia'₂ jua'₅₄ a₂tsá₃ ca₂rë₃jei'₅₄. Të₂le₃ 'io'₂ gué₄ ca₂guei'₅₄ bá₄ 'nia'₂ jniá₂ nē₂jag₄ bá₄ jan₂ ángel quián₅ Diú₄, nē₂jag₄ bá₄ líng₅ Cristo Jesús 'ŋiog₅. ¹⁵ ¿'E₂ bá₄ ca₂lë₃ quian'₅₄ a₂ŋí₄ lë₃ dse₃ jme₁ca₂'ág₂ 'au'₂ 'nia'₂ le₂jaun₂? Lé₂ le₃juá'₄ jniá₂, jua'₅₄ mei'₂ gué₃ lé₂, jme₁'uë'₄ 'nia'₂ míg₂ ne'₅₄ guiong'₅₄, a₂jme₁cué'₁ jniá₂. ¹⁶ Jaun₂ nē₃, ¿on₃ bá₄ lín'₂ 'nia'₂ a₂'iog₅₄ bá₄ jniá₂ ia₁ a₂juá'₅ lia'₂ tí₅ jág?

¹⁷ Dsa₂ 'éi₂ nē₃, 'ŋio₅ dsen₅₄ dsí₅ jmo₂₃ quian'₅₄ 'nia'₂, la₁ on₃jua'₅₄ a₂dse₃ dsón'₂ lia'₂ dsi₂jio₅ dsí₅. A₂'no'₂ jui₅ a₂téi'₄ 'nia'₂ jnia'₅₄, ia₁jaun₂ le₃dsen₅₄ 'au'₂ a₂'éin'₄ guioin₅₄. ¹⁸ A₂dsón'₂ a₂dse₃ bá₄ jaun₂ a₂cué'₅ dsa₂ bí₂ riin'₅₄, chi₂jua'₂ a₂jaun₂ bá₄ a₂dse₃ a₂dsi₂jio₅ dsí₅. La₁ jui₁jmo₁₂ le₂jaun₂ co₂tan₅₄, on₃jua'₅₄ rë'₂ jmá'₃ jme₁'en₅₄ jniá₂ quian'₅₄ 'nia'₂. ¹⁹ 'Nia'₂ chi'₂-guein₂ quiáng₃, con'₂ síá'₂ táng₃ ma₂ŋag₅₄ uig₅ o₄quián'₂ 'nia'₂, líng₅ nē₂jag₄ bá₄ jan₂ 'io₅₄ i₂chan₂ uig₅; caun₂ ŋag₅₄ uig₅ le₂nē₅ bá₄ ca₂lia'₂ ca₂lín'₃ 'nia'₂ a₂dsi₁nóg'₅ léng'₂ lia'₂ lín₅ Cristo. ²⁰ jua'₅₄ mei'₂ bá₄ lé₂ le₃dsióg₄ jniá₂ të₂nē₃ ja₁con'₂ 'nia'₂, ia₁jaun₂ jme₁tsíng₄ 'a₂ lia'₂ dsia₅₄ jág₁ quian'₅₄ 'nia'₂! Ia₁ 'ŋio₅ lín₃ tsá₃ guion₅₄ 'a₂ lia'₂ jmo₅₄ quian'₅₄ 'nia'₂.

*Jág*₁ jáng'₅ léi₄ jui₁lia'₂ Agar quian'₅₄ Sara

²¹ 'Nia'₂ con'₂ dsa₂ i₂'niog'₂ tón'₄ táng₃ 'Éi'₃ Juá'₅, ŋag₄ caun₂ 'nia'₂ a₂juá'₄ jniá₂ la₂: ¿Tsa₁ ma₂nei'₂ 'nia'₂ a₂juá'₂ 'Éi'₃ jaun₂? ²² Ia₁ juá'₂ Si₂ 'iin₂₃ Abraham, 'éi₂ nē₃ ca₂rë₃chán₃ on₃ ja₁ŋi'₅₄. Jan₂ i₂ca₂can₃ dsa₂ mí₂ i₂jme₁jme₂ti₃ ta₁ ne₅₄; jan₂ gué'₂ i₂ca₂can₃ dsa₂

mí₂ quiáin₅ dsón'₂ i₂tsá₃ 'ein₂ ne₄ dsa₂ sián'₂ jme₂ti₃.
²³ Guein₂ i₂ca₂can₃ dsa₂ mí₂ i₂jme₂ti₃ ta₁ ne₄ Abraham,
 ca₂rë₃cháin₃ con'₂ lé₅ rë₂chan₂ guein₂ lë₁guein₂, la₁ guein₂
 i₂ca₂can₃ dsa₂ mí₂ quián₅ Abraham 'ñiog₅ në₃ ca₂rë₃cháin₃
 a₂ca₂rë₃ti₃ jág₁ a₂cué₁ quió'₅ Diú₄. ²⁴ Jág₁ në₅, lé₅ caun₂
 jág₁ a₂jáng'₅ lé₁₄. Le₃on₃ 'io₅₄ në₅ co₂'nió'₄ tin₃ jág₁ a₂l'₅₄
 Abraham quian'₅₄ Diú₄. Caun₂ jág₁ në₅ lé₅ co₂'nió'₄ Má'₂
 Sinaí a₂jáng'₅ lé₁₄ tē₂le₃ quió'₅ Agar i₂cán₂ guein₂ i₂'i₄ 'éi'₃
 jme₃ti₃ ta₁ ne₄ dsa₂. ²⁵ Jaun₂ lín₅ Agar co₂'nió'₄ Má'₂ Sinaí,
 a₂chí'₅ 'uë₃ Arabia, a₂lé₅ caun₂ nió'₄ quió'₅ Jerusalén jmig₄
 në₃, ia₁ tion'₅₄ dsa₂ chan₂ ciudad jaun₂ jme₂ti₃ 'éi'₃ co₂dsia₅
 quiaín'₅₄ chí'₂-guein₂ quiáin₅. ²⁶ La₁ jui₁lia'₂ Jerusalén 'mí₂
 quió'₅ guei'₅₄ në₃, rë₂na₄ bá₄ jui₅; jaun₂ ja₁jaun₂ bá₄ lé₅
 në₂jag₄ bá₄ chog₅₄ jniog₄. ²⁷ Ia₁ ne₄ Si₂ juá'₂:
 Quian₂ o₂'ñi₃ dsi₅, 'ne₂ 'io₅₄ quen₂,

'ne₂ dsa₂ mí₂ i₂tsá₃ guein₂ ma₂can₅,

'ú₅ co₂mi'₅₄ guio'₅₄ a₂'io'₂ jéng'₂,

'ne₂ i₂tsá₃ 'e₂ jme₁ma₂cuíng'₂ 'e₂ jaun₂ a₂chang'₂ uig₅.

Ia₁ tē₂le₃ juín₅ gué₄ guein₂ le₃chan₂ bá₄

quió'₅ dsa₂ mí₂ i₂ca₂téi₂ dsa₂,

lia'₂ con'₂ gué₄ dsa₂ mí₂ i₂chan₂ dsi₂i₂gu₂.†

²⁸ Rin'₅₄ jniog₄, lín'₅ bá₄ 'nia'₂ jui₁lia'₂ Isaac; lín'₅
 'nia'₂ chí'₂-guein₂ con'₂ lé₅ jág₁ ca₂cué₃ Diú₄. ²⁹ Le₂në₅
 bá₄ jui₁lia'₂ jmig₄ jaun₂, ja₁ñi'₅₄ i₂ca₂rë₃chán₃ con'₂ lé₅
 rë₂chan₂ ca₂le₃jín₃, qui₂ca₂co₃'ein₃ bá₄ ja₁ñi'₅₄ Abraham
 i₂ca₂rë₃chán₃ con'₂ ta₁ quió'₅ jme₂dsí₂, le₂në₅ bá₄ lé₅ rë₂në₃
 ján₃. ³⁰ ¿La₁ 'e₂ juá'₂ ne₄ Si₂? Juá'₂: “Dsen₅₄ dsi₂néi₂ 'io₅₄
 i₂jme₂ti₃ ta₁ ne'₅₄ në₅ lia'₂ jma₃quiaín'₅₄ ja₁ñi'₅₄, ia₁ lia'₂
 o₁líg'₂ jmig₄ jua'₅₄ ja₁ñi'₅₄ 'io₅₄ 'lian'₅₄ në₅ ca₂tín₂ tiín₅₄

† 4:27 Isaías 54:1.

a₂dse₃ a₂ca₂tín₂ ja₁ñi'₅₄ 'io₅₄ i₂jín₅₄. † 31 Jaun₂ né₃, rin'₅₄ jniog₄, tsá₃ lág₅ jniog₄ chi'₂-guein₂ quián₅ 'io₅₄ i₂co₂'nió'₄ chi₁'ñe'₅₄ 'éi₂. Lág₅ bá₄ jniog₄ chi'₂-guein₂ quián₅ 'io₅₄ i₂jín₅₄ § bá₄.

5

Tiá₂ nau₂ 'nia'₂ jui₅ rē₂na₄

¹ Cristo ca₂chéi'₂ jniog₄, ia₁jaun₂ tsá₃ ma₃le₃chong₂ jua'₅₄ a₂le₁'ñei'₅₄ gué₄. Jaun₂ tiá₂ nau₂ 'nia'₂ jui₅ rē₂na₄, tsá₃ ma₃tón'₂ 'nia'₂ táng₃ uig₅ 'éi'₃ guei₂ co₂'nió'₄ a₂jmo₅ a₂rē₂'ñe'₅₄ dsa₂. ² Jaun₂ rē₂ nei₂ 'nia'₂. Jniá₂ Pa₄, juí₂g₂ 'nia'₂: Nē₁jua'₂ cuín'₅ 'nia'₂ a₂ti₃ dsa₂ ni₁lo'₄, jaun₂ dsióg₅ 'i₁ca₂juig₄ tsá₃ 'e₂ ta₁ tén₄ Cristo ja₁con'₂ 'nia'₂. ³ 'Nio₃ jniá₂ juá'₄ táng₃: nē₁'ein₂ cuín'₅ a₂ti₃ dsa₂ ni₁lo₁₂, ca₂tín₂ jme₃ti₃ ca₂le₃jé₃ 'éi'₃ qui'₅ Si₂ quió'₅ Moisés. ⁴ 'Nia'₂ i₂'náu'₂ jui₅ a₂guéi'₂ Diú₄ a₂lín₂g'₅ dsa₂ dsen₃ tē₂le₃ 'uig₅₄ ia₁ a₂rē₂ten'₅₄ 'nia'₂ 'Éi'₃, ca₂dsióg₃ táng₃ co₂dsia₅ ma₂ca₂'nia'₅₄ bá₄ 'nia'₂ jág₁ quian'₅₄ Cristo; ma₂i₂uín'₃ bá₄ táng₃ 'nia'₂ ja₁dsia₅ Diú₄ 'ua₁ dsí₅ ja₁con'₂ 'nia'₂. ⁵ Ia₁ tē₂le₃ quian'₅₄ Jme₂dsí₂, tē₂le₃ jnia'₅₄ 'a₂ con'₂ 'éin₂ bá₄ jniog₄, chong₂ a₂'ín₂ dsi₅ le₁jñia₁ a₂já₅ caun₂ jmi₂g₄ jē₁léi₂ dsón'₂ jniog₄ dsa₂ dsen₃. ⁶ Ia₁ nē₁jua'₂ chong₂ le₃quió'₅ Cristo Jesús, tsá₃ 'e₂ ta₁ jmo₃ o₁jñia'₅₄ a₂rē₂uín₂g₄ o₃ tsá₃ rē₂uín₂g₄ 'e₂ lo₄ dsa₂. Ia₁ a₂le₃'éin₂ bá₄ tē₃dsón'₂ quen₅, a₂le₃jniá₂ tē₂le₃ quian'₅₄ a₂jme₁'nió'₄ jniog₄ rin'₅₄. ⁷ Dse₃ bá₄ lia'₂ con'₂ jme₁ma₂ja₂nó'₅ 'nia'₂. ¿'Ein₂ bá₄ ca₂jmo₃ jnág₅ jui₅ jaun₂ tsá₃ ma₃nág'₁ gau₂ jág₁ a₂tí₅ dsón'₂? ⁸ On₃jua'₅₄ a₂jaun₂ a₂ma₂tē₅ Diú₄ 'nia'₂ jua'₅₄ a₂jmo'₂ le₂nē₅. ⁹ Lé₅ jui₁lia'₂ juá'₂ jág₁ quió'₅ dsa₂ ma₂líg'₂: “Quian'₅₄ ca₂juig₄ bá₄ jui₁

† 4:30 Génesis 21:10. § 4:31 o₃, “'io₅₄ i₂lon₄.”

levadura, jmo₃ ta₁ guion'₂ ca₂le₃jé₃ ti₁can₁.” 10 Caun₂ bá₄ 'eis dsi₃ të₂le₃ ja₁con₂ Te₁gui'₅₄, a₂tsá₃ ma₃dsi₃jiog₅ 'au'₂ 'nia'₂ le₂siá'₂; Diú₄ bá₄ 'é₂ uig₅ quió'₅ dsa₂ i₂chi₂jan₅ chi₂nei₂₃ jág₁ jin'₄ 'nia'₂, tsá₃ a₂lé₅ jaun₂ jui₁'ein₂ gué₃. 11 Të₂le₃ quió₃ gué'₂ rin'₅₄ jniog₄, jua'₅₄ mei'₂ gué₃ ŋi₅ jniá₂ te₁neg'₅₄ dsa₂ a₂ti₃ lo₅₄, ʔ'e₂ gué'₂ lë₃ qui₂co₂'ein₅ dsa₂ jniá₂? Jág₁ dse₃ a₂rë₂'é₂ quió'₅ Cristo a₂ca₂join₃ ne₄ cróg₄, tsá₃ 'lig'₅₄ jme₁tiin₃ jua'₅₄ mei'₂ gué₃ le₂jaun₂. 12 La₁ jui₁lia'₂ dsa₂ i₂cuë₅ o₂me'₅₄ dsi₅ 'nia'₂ a₂'ë₂₃ a₂ti₃ dsa₂ lo₅₄, ʔjua'₅₄ co₂ŋei'₅₄ bá₄ ti₃ quió'₅ guioin₅₄!

13 Ia₁ 'nia'₂, rin'₅₄ jniog₄, ma₂ca₂rë₃té₄ a₂lén'₂ 'nia'₂ dsa₂ i₂i₂nio₄ lon₄. Jŋia'₅₄ lia'₂ tsá₃ cuín₅ 'nia'₂ jmig₄ jua'₅₄ a₂jme₁ti'₄ gué₄ 'nia'₂ a₂mi₅ ni₁ŋi'₁ ia₁ a₂lín'₅ dsa₂ i₂ma₂lón₂. Të₂le₃ jme₁ti₁ 'nia'₂ ja₁con₂ ríng'₂ le₂jang'₂ le₂jang'₂, të₂le₃ ia₁ a₂'nió'₃ 'nia'₂ ríng'₂. 14 Ia₁ quian'₅₄ ca₂jon₄ jág₁ bá₄ a₂rë₂'ŋia₅ ca₂le₃jé₃ 'Éi'₃ Juá'₅: “Jme₁'nió₄ dsa₂ mi₂güüg₃ ríng'₂ jui₁lia'₂ 'nióg'₃ 'ŋiag'₂.”* 15 La₁ nē₁jua'₂ tion'₅₄ 'nia'₂ quíng'₅ ríng'₂ quian'₅₄ i₂la₂ i₂ó₃, të₃ŋi'₅₄ quián'₂ 'nia'₂ ia₁ con'₂ tsá₃ ŋó₅ nē₁jua'₂ guion'₅₄ bá₄ 'nia'₂ qui₂co₂dsi₃'éng'₅.

'A₂ lia'₂ le₃chan₂ dsa₂ të₂le₃ quió'₅ Jme₂dsi₂ mi₂güüg₃ la₂

16 A₂la₂ bá₄ a₂juíg₂ jniá₂ 'nia'₂: Jui₁le₂chan'₂ bá₄ 'nia'₂ con'₂ lé₅ jiog₅ Jme₂dsi₂, jaun₂ bá₄ dsióg₄ a₂tsá₃ ma₃jme₁ti'₄ 'nia'₂ a₂mi₅ ni₁ŋi'₁. 17 Ia₁ ca₂le₃jé₃ a₂'ín₅ dsi₅ ni₁ŋi₁ dsa₂, 'io'₅₄ Jme₂dsi₂ quián₅ Diú₄. Ján₃ gué'₂ le₂jaun₂ a₂'ín₅ dsi₅ Jme₂dsi₂ 'io'₅₄ ni₁ŋi'₅ táng₃. Tsá₃ jein'₂; lé₅ 'nei₂. 'Uig₅₄ jaun₂ bá₄ tsá₃ lé₂ le₃jmó'₂ 'nia'₂ a₂'niog'₂. 18 Ia₁ nē₁jua'₂ jiog₅ Jme₂dsi₂, tsá₃ ma₃tiong'₅₄ 'Éi'₃ Juá'₅. 19 Ia₁

* 5:14 Levítico 19:18.

a₂rē₂jniá₂ dse₃ bá₄ 'a₂ lia'₂ lé₅ chan₂ dsa₂ i₂i₂nio₄ con'₂
 lé₅ 'hio₂ dsí₅ ni₁hí₁₂: nió'₅ jág₁ a₂tsá₃ dsi₂ten₅₄ nió'₃;
 i₂nioi₅₄ 'hio₅ lē₁'hioi₅ 'e₂ gué₃ a₂jmo₅-dsáu₅; tsá₃ con₂
 dsí₅; ²⁰ qui₂jme₂gain₃ diú₄ lag₄; jmo₂₃ mí₅ a₂chan₂ dsí₅; †
 i₂'hia₅₄ dsa₂ mi₂güí₃ rin'₅₄; i₂qui₂tsin₅ quian'₅₄ rin'₅₄;
 i₂dsí'₅ 'uin₅ dsí₅; i₂caun₂ lē₁rē₂'ne₂; i₂'ē'₂ a₂cha₂ quió'₅;
 i₂dsia₅ mi'₅₄ jmo₅ le₁dson'₅₄ dsa₂; i₂jmo₅ jmá'₃ co₂nió'₃
 quian'₅₄ riin'₅₄; ²¹ i₂uig₅ dsí₅; [i₂jme₂dsian₅ rin'₅₄]; ‡ i₂i₂nio₄
 lē₁'en₅; qui₂jmo₂₃ jmig₄ ja₁qui₂jmo₅-dsáu₅ a₂'lig'₅₄ né₃.
 'Lióng₂ bá₄ gué₄ a₂siá'₂ jmo₅ i₂lin₅₄ a₂mei'₂ tsá₃ co₂rē₂
 ján₃. Jaun₂ 'é₅ jniá₂ jág₁ tē₃jhiá₅, jui₁lia'₂ ma₂juá'₃ jniá₂
 le₂jhiá₅ ma₂juí₂ 'nia'₂, ca₂le₃jín₃ dsa₂ i₂qui₂jmo₅-dsáu₅
 a₂nē₅ o₁líg'₂ jmig₄ tsá₃ tíin'₄ ja₁gon₂ Diú₄. ²² La₁ le₂la₂ bá₄
 chan₂ dsa₂ i₂jio₅ Jme₂dsí₂: A₂'nioi₃ riin'₅₄; chain₂ o₂'hio₃
 dsi₅; tei₄ le₁'ág₄ dsí₅ né₃, ton'₂ juin'₂ dsí₅ lín₅; 'hio₂ dsí₅
 quia₁in'₅₄ riin'₅₄; jmo₂₃ a₂dse₃ dsí₅ ja₁con₂ riin'₅₄ né₃; tí₅ jág₁
 quió'₅ nē₁'e₂ jág₁ jmo₂₃ quia₁in'₅₄ riin'₅₄. ²³ 'Ua₁ dsí₅ lín₅
 ja₁con₂ riin'₅₄; hi₅ 'a₂ lia'₂ jme₃'uáin₂ dsí₅ 'hio₅ 'e₂ jme₁ja₂
 dsí₅ jmo₃. 'I₁caun₂ 'éi'₃ tsá₃ cha₂ jua'₅₄ a₂lé₂ le₃'liog'₃
 quió'₅ dsa₂ i₂chan₂ le₂nē₅. ²⁴ Ia₁ dsa₂ i₂ma₂lín₅ quían₅
 Cristo, nē₂jag₄ bá₄ a₂ma₂ca₂i₃lé₂ ne₄ cróg₄ ca₂le₃jé₃ lia'₂
 lé₅ jme₁lín₄ chain₂ mi₂güí₃, co₂dsia₅ quian'₅₄ a₂jme₁'ín₅
 dsí₅, a₂jme₁qui₂dsi₂jio₅ dsí₅ jmo₃ né₃. ²⁵ Le₂nē₅ chi₂jua'₂
 chong₂ jnio₄ tē₂le₃ quian'₅₄ Jme₂dsí₂, ján₃ bá₄ jui₁i₁nio₁
 jnio₄ lia'₂ jio₅ Jme₂dsí₂. ²⁶ Tsá₃ ca₂tág₂ jnio₄ jmó₁ táu'₅,
 on₃ gué'₂ dsiá₁ mi'₅₄ le₂jau₂ le₂jau₂, on₃ gué'₂ jmó₁ uig₅ dsí₅
 quian'₅₄ rin'₅₄.

† 5:20 griego: farmakeía. ‡ 5:21 A₂lin₅₄ chog₅₄ si₂ tsá₃ le₁ton₅
 jág₁ nē₅.

6

*Jme*₁'on₁ 'nia'₂ ríng'₂ le₂jang'₂ le₂jang'₂

¹ Rin'₅₄ jniog₄, nē₁'ein₂ 'nia'₂ ca₂tán'₂ dso₄, 'nia'₂ guē'₂ con'₂ i₂ma₂jio₅ Jme₂dsí₂, ca₂tín'₂ 'nia'₂ jme₁'oin'₁, ia₁jaun₂ roin'₂ táng₃, jmó'₂ 'nia'₂ 'ua₁ 'au'₂ ja₁coin₂. La₁ 'í₁ jmo₄, ia₁ con'₂ tsá₃ njó₅ nē₁le₂jio₅ 'njiag'₂ ca₂táng'₂ ján₃. ² Jme₁'on₁ 'nia'₂ ríng'₂ le₂jang'₂ le₂jang'₂, chi₂jua'₂ 'e₂ caun₂ o₂me'₅₄ dsí₅ guei₂ quian₅ ríng'₂, ia₁ le₂nē₅ bá₄ le₃ten'₅₄ 'nia'₂ 'éi'₃ a₂ca₂quiog₂ Cristo.* ³ Ia₁ nē₁jua'₂ chan₂ 'ein₂ lín₂ tiin₂ jmo₂₃, nē₁jua'₂ tsá₃ 'e₂ ta₁ téin₄ guē'₂ né₃, jme₂gain₂₃ 'njiog₅. ⁴ Le₂jan₂ le₂jan₂ bá₄ dsa₂ ca₂tiin₂ con₂ 'í₁ 'a₂ lia'₂ jnia'₅₄ ma₂lé₅ chain₂ guoin₅₄. Nē₁jua'₂ ca₂rē₃lí'₄ rē₂ ma₂chain₂, tióin₂ dse₃ guoin₅₄ bá₄, on₃jua'₅₄ jnia'₅₄ 'nio₃ chein'₃ dse₃ o₄quió'₄ i₂sián'₂. ⁵ Ia₁ i₂jma₃quén₅ cán₂ guei₂ o₂me'₅₄ dsí₅ guoin₅₄ bá₄ dsa₂ le₂jain₂ le₂jain₂.

⁶ Jui₁lia'₂ dsa₂ i₂rē₂tin₂ jág₁ quió'₅ Diú₄, ca₂tiin₂ jme₃'oin₅₄ tē₅ quián₅ quian'₅₄ ca₂le₃jé₃ ne₅₄ a₂dse₃ a₂cha₂ quió'₅. ⁷ Tsá₃ lē₁jme₂gán₁ 'nia'₂ 'au'₂ guiong'₅₄: ia₁ 'i₁jan₂ tsá₃ 'ein₂ lé₂ lē₁co₃jmá'₂ Diú₄, ia₁ chi₂jua'₂ 'e₂ caun₂ a₂jne₅ dsa₂, a₂jaun₂ bá₄ ráu₃ quió'₅. ⁸ Jui₁lia'₂ jan₂ dsa₂ i₂jne₅ a₂'ín₅ dsí₅ ni₁ñi₁ 'njiog₅, jui₅ ni₁ñi₁₂ jaun₂ bá₄ ro'₂ 'mú₃; la₁ dsa₂ i₂jne₅ tē₂le₃ quió'₅ Jme₂dsí₂, jui₅ Jme₂dsí₂ bá₄ ráu₃ quió'₅ ján₃ a₂le₃chain₂ co₂tan₅₄. ⁹ Le₂nē₅ bá₄, tsá₃ lē₁o₁'ú'₄ dsí₅ jniog₄ a₂jmó₁ a₂dse₃; ia₁ nē₁jua'₂ tsá₃ ca₂'ág₂ caun₂-tín₃ dsí₅ jniog₄, já₅ bá₄ jmig₄ tē₅₄ a₂ráu₃ quián₂. ¹⁰ Jaun₂ lē₃, lia'₂ co₂ráun₂ lé₂ le₃jmó₁, o₁jmó₁ jniog₄ a₂dse₃ ja₁con₂ ca₂le₃jín₃, la₁ ja₂lín₃ gué'₄ le₃ja₁con₂ rin'₅₄ jniog₄ i₂'én₂.

É₂ gué'₄ jág₁ tē₃jñiá₅, jē₁'ág'₅ jág₁

* 6:2 'Nio'₂ ja₁ton₅ Juan 13:34.

¹¹ Jag₄ 'nia'₂ quian'₅₄ letras ca₁ca'₅₄ jmo₂₃ quian'₅₄ gu₃ 'ñi₃,† si₂ a₂tsing₂ ne'₅₄ 'nia'₂. ¹² Dsa₂ i₂jñia'₅₄ 'nio₃ le₃jñiai₂ tióin₂ dse₃, chi₂quiáin₂ jmig₄ 'nia'₂ a₂tí'₁ 'nia'₂ lo'₅₄; jmo₂₃ le₂jaun₂ ia₁jaun₂ tsá₃ 'ein₂ co₃'ein₃ 'uig₅₄ ne₄ jág₁ quió'₅ cróg₄ quió'₅ Cristo. ¹³ Ca₂lia'₂ jñia'₅₄ guion₅₄ dsa₂ i₂ti₅ lo₄ 'éi₂, tsá₃ a₂jaun₂ jme₂ti₃ a₂juá'₂ ca₂le₃jé₃ 'Éi'₃ Juá'₅ jaun₂. La₁ 'nio₃ né₃ a₂tí'₁ 'nia'₂ quiáng'₂, ia₁jaun₂ le₃jmo₃ táin'₅ ja₁con₂ ni₁ñi'₁ 'nia'₂. ¹⁴ La₁ jniá₂ né₃, o₁líg'₂ tsá₃ 'nio₃ jmo₅₄ táng'₅, jñia'₅₄ lia'₂ le₃quió'₅ 'mú₃ a₂ca₂i₃ñí₂ Te₁gui'₅₄ Jesucristo quián₂ jniog₄ ne₄ cróg₄ bá₄, ia₁ 'uig₅₄ a₂ca₂jon₃ Cristo ne₄ cróg₄, ma₂ca₂ñí₂ bá₄ mi₂güüg₃ ja₁con₂ jniá₂; ján₃ gué'₂ le₂jaun₂ co₂'nió'₄ ma₂jon₅ bá₄ jniá₂ tē₂le₃ ne₄ mi₂güüg₃. ¹⁵ Jaun₂ né₃, 'i₁caun₂ tsá₃ 'e₂ quen₅ a₂rē₂uing₄ o₃ a₂tsá₃ 'e₂ rē₂uing₄ lo₄ dsa₂; la₁ a₂léi₂ jniog₄ dsa₂ i₂ma₂ca₂rē₃'mag'₂ tē₂dsí₅, a₂nē₅ bá₄ dsón'₂ a₂quen₅. ¹⁶ Tē₂le₃ ja₁con₂ ca₂le₃jín₃ dsa₂ i₂i₂nio₄ lia'₂ con'₂ lé₅ jág₁ nē₅, jui₁le₁ 'ág₄ bá₄ tei₄ 'au'₂ 'nia'₂, jui₁dsia₅₄ bá₄ Diú₄ néi₂ dsí₅ ja₁con'₂ 'nia'₂ i₂lín'₅ tē₃dsón'₂ dsa₂ juig₂ quiáin₅. ¹⁷ Né₃ né₃, tē₂le₃ ne₄ jui₅ ja₁dsau₅₄ nē₅, 'i₁jan₂ tsá₃ 'ein₂ jui₁cué₅₄ o₂me'₅₄ dsí₃, ia₁ ma₂quian₄ bá₄ jniá₂ 'ñi₃ léi₄ tio'₅₄ ni₁ñi₃ a₂jáng'₅ jág₁ dsau₅ a₂lín'₅ tē₃dsón'₂ jan₂ dsa₂ quián₅ Jesús. ¹⁸ Jui₁jme₂gu'₅₄ bá₄ Te₁gui'₅₄ Jesucristo quián₂ jniog₄ jme₂dsí₂ quián'₂ 'nia'₂, rin'₅₄ jniog₄. A₂méi₃. Co₂nē₅.

† 6:11 'Nio'₂ ja₁ton₅ 1 Corintios 16:21; Colosenses 4:18; 2 Tesalonicenses 3:17; Filemón 19.

Jag₁ 'mí₂ a₂ma₂li' ₅₄ quian' ₅₄ Diu₄
 New Testament in Chinantec, Tepetotutla (MX:cnt:Chinantec,
 Tepetotutla)

copyright © 1994 Wycliffe Bible Translators, Inc.

Language: Chinantec, Tepetotutla

Translation by: Wycliffe Bible Translators, Inc.

Chinanteco, Tepetotutla [cnt], Mexico

Copyright Information

© 1994, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Chinantec, Tepetotutla

© 1994, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 14 Jun 2022 from source files dated 30 Nov 2021

5c52af9e-3086-5d57-9b7e-2e495fea8899